



REPUBLIKA E SHQIPËRISË
ENTI RREGULLATOR I ENERGJISË
BORDI

VENDIM

Nr. 193, Datë 12.08.2025

MBI

**PROCEDURËN E TRAJTIMIT TË KËRKESAVE TË TË LICENCUARVE TË CILËT
PLOTËSOJNË KRITERET LIGJORE PËR MARRJEN E AUTORIZIMIT NGA ERE,
PËR TRANSFERIM ASETESH NË SEKTORIN E ENERGJISË ELEKTRIKE DHE
GAZIT NATYROR, QË NË FAZËN E PARË TË APLIKIMIT**

Në mbështetje të neneve 16, 20, gërma “a”, dhe 44 të ligjit nr. 43/2015, “Për sektorin e energjisë elektrike”, i ndryshuar; nenit 113 të ligjit nr. 44/2015, “Kodi i Procedurave Administrative të Republikës së Shqipërisë”; neneve 3, 6, 7 dhe 8 të Rregullores së procedurave të transferimit të aseteve nga të licencuarit, miratuar me vendimin e bordit të Entit Rregullator të Energjisë (ERE) nr. 119, datë 21.07.2016; nenit 19, pika 1, gërma “a”, të Rregullores për organizimin, funksionimin dhe procedurat e ERE-s, miratuar me vendimin e bordit të ERE-s nr. 96, datë 17.06.2016; si dhe pikave 1.3 dhe 1.6 të “Kushteve të licencës për prodhimin e energjisë elektrike”; Bordi i ERE-s, në mbledhjen e tij të datës 12.08.2025, mbasi shqyrtoi propozimin sipas praktikës Memo me nr. 2307/3 prot., datë 12.08.2025, të Këshilltares së Bordit dhe Sekretarit të Përgjithshëm, në kuadër të shqyrtimit të kërkesës së shoqërisë “SPV BLUE 2” sh.p.k., “për marrjen e autorizimit nga ERE për transferimin (nëpërmjet marrëveshjes siguruese) të aseteve fikse të saj, në favor të “Banka e Tiranës” sh.a., “Banka OTP Albania” sh.a., “Intesa Sanpaolo Bank Albania” sh.a.”, si dhe u njoh me qëndrimin e Drejtorisë së Licencimit dhe Autorizimeve,

Konstatoi se:

- Bordi i ERE-s me vendimin nr. 119, datë 21.07.2016, ka miratuar “Rregulloren e procedurave të transferimit të aseteve nga të licencuarit”.
- Rregullorja e procedurave të transferimit të aseteve nga të licencuarit, në nenin 8 të saj, përcakton se: “Pasi shqyrton kërkesën e paraqitur nga subjekti i licencuar, në lidhje me transferimin e aseteve, Bordi i ERE shpreh me vendim për fillimin ose jo të procedurave, sipas Rregullave të Praktikës dhe Procedurave të ERE dhe kësaj rregullore”.
- Në referencë të nenit 10, pika 1, të Rregullores së procedurave të transferimit të aseteve nga të licencuarit, citohet se: “Shqyrtimi i kërkesës për transferimin e aseteve, nëse i licencuari ka plotësuar tërësisht informacionin dhe dokumentacionin e kërkuar, do të bëhet brenda 45 ditëve pune nga marrja e vendimit për fillimin e procedurave të shqyrtimit.”.
- Në relacionin me nr. 2199/1 prot., datë 07.08.2025, të Drejtorisë së Licencimit dhe Autorizimeve “Mbi kërkesën e shoqërisë ‘SPV BLUE 2’ sh.p.k. për marrjen e autorizimit nga ERE për transferimin (nëpërmjet marrëveshjes siguruese) të aseteve fikse të saj, në favor të

'Banka e Tiranës' sh.a., 'Banka OTP Albania' sh.a., 'Intesa Sanpaolo Bank Albania' sh.a. dhe 'Union Bank' sh.a.", është evidentuar se i licencuari ka plotësuar të gjithë dokumentacionin e kërkuar nga neni 7 i "Rregullores së procedurave të transferimit të asetëve nga të licencuarit", që në fazën e parë të paraqitjes së kërkesës për autorizim për transferim asetesh.

- Përsa më sipër, me qëllimin për të orientuar më drejt vendimmarrjen e bordit të ERE-s, në referencë të lehtësimit të procedurave dhe në ndihmë të subjekteve aplikues, duke mbajtur në konsideratë faktin që subjekti "SPV BLUE 2" sh.p.k. është i licencuari i parë që ka plotësuar gjithë dokumentacionin e kërkuar sipas nenit 7 të Rregullores së sipërpërmendur dhe se nuk nevojitet të analizohet më tej asnjë dokument apo të përfshihet asnjë palë e tretë në procesin e transferimit të asetëve, bordi do të vijojë me shqyrtimin në tërësi në rastin e këtij aplikimi dhe të çdo aplikimi që do të konstatohet me dokumentacion të plotësuar që në fazën fillestare.
- Ky vendim do të zbatohet për të gjithë të licencuarit në sektorin e energjisë elektrike dhe të gazit natyror që aplikojnë në ERE për marrjen e autorizimit për transferim asetesh dhe plotësojnë në mënyrë të saktë gjithë dokumentacionin e kërkuar, konform nenit 7 të "Rregullores së procedurave të transferimit të asetëve nga të licencuarit", të miratuar me vendimin e bordit të ERE-s nr. 119, datë 21.07.2016, që në fazën e aplikimit.
- Në këtë mënyrë, vendimi është në përputhje me parimin e proporcionalitetit, sipas nenit 12 të Kodit të Procedurave Administrative, pasi është i nevojshëm për realizimin e qëllimit ligjor të rregullimit dhe unifikimit të praktikës së autorizimit të transferimit të asetëve, është i përshtatshëm duke siguruar trajtim të barabartë dhe të njëtrajtshëm për të gjithë subjektet e licencuara që paraqesin dokumentacion të plotë dhe është në përpjesëtim të drejtë me objektivin e ndjekur, duke shmangur procedura shtesë dhe kufizime të panevojshme ndaj subjekteve dhe duke garantuar një proces më të qartë, më të lehtë dhe më efikas.
- Neni 113 i ligjit nr. 44/2015, "Kodi i Procedurave Administrative të Republikës së Shqipërisë", parashikon mundësinë e ndryshimit të një akti me nismën e vetë organit që e ka nxjerrë, duke përcaktuar edhe formën ligjore të këtij ndryshimi të aktit, e cila bëhet me një akt të ri me shkrim.

Për gjithë sa më sipër, bordi i ERE-s,

Vendosi:

1. Për të licencuarit që aplikojnë për marrjen e autorizimit nga ERE për transferimin (nëpërmjet vendosjes së barrës sigurorese) të asetëve fikse, dhe që kanë plotësuar gjithë dokumentacionin e kërkuar nga "Rregullorja e procedurave të transferimit të asetëve nga të licencuarit", miratuar me vendimin e bordit të ERE-s nr. 119, datë 21.07.2016, që në fazën e parë të aplikimit, bordi i ERE-s do të shprehet mbi kërkesën për dhënie autorizimi për transferim aset brenda 45 ditëve nga aplikimi.
2. Drejtoria e Licencimit dhe Autorizimeve, të njoftojë të gjitha palët e interesit për vendimin e bordit të ERE-s.

3. Ky vendim do të zbatohet për të gjithë të licencuarit në sektorin e energjisë elektrike dhe të gazit natyror që aplikojnë në ERE për marrjen e autorizimit për transferim asetesh dhe plotësojnë në mënyrë të saktë gjithë dokumentacionin e kërkuar konform nenit 7 të “*Rregullores së procedurave të transferimit të asetëve nga të licensuarit*”, që në fazën e aplikimit, duke filluar nga data e hyrjes në fuqi e këtij vendimi.

Ky vendim hyn në fuqi menjëherë.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETARI

Petrit AHMETI